



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

#### 4. Kalenderwoche – ab 22. Januar 2011

## Währ dud gewinn?

Es is werglisch herrlich - irschendwas is immor los! Immor schbannend! Eene Gadaschdrofe jachd de näschsde! Wie die das bloß immor hingrischn? Schbidze!

Isch meene, das is beschdimmd nisch eenfach, so das rischdische Deiming! Deiming - das is, dass was zum rischdischn Zeidbunkd bassiern dud - nisch zu frieh un nisch zu schbähd!

Schdelln Sie sisch vor, das mid die Diogsien-Eior, das wäre middn im Schneechaos bassierd, grade wo alle Schdraßn unbassierbar un zugeschidded warn, mid dähm weißn Zeisch. Friehor ham sisch de Leide ibrischens gefreid, wenss weiße Weihnachdn gegähm had... heide machn mir eene eschde Gadaschdrofe draus! Das is nisch eenfach!

Jednfalls - middn im Schneechaos wärn de Diogsien-Eior gladd unnorgegang. Beziehungsweise - im Schnee vorwehd! Mir häddn alle froh un frehlich de Diogsien-Eior gefressn, wie als wenn nischd bassierd sein däde. Mir häddn de Eior un ooch de Schweine... un was ooch sonsd noch mid Diogsien gefiddord wordn is... mir häddn das in uns neingefuddord wie schon seid Jahr un Daach. Un dran geschdorm wärn mor ooch nisch!

Guhd, wenn dann werglisch welsche dran geschdorm sein dädn... dann hädde villeischd das Schneechaos einbaggn kenn! Dann hädde villeischd dor Diogsien-Schgandahl iebor das Schneechaos gesieschd! Dann villeischd!

So ab drei Dode, willsch ma grob schädzn, hädde das Diogsien eene reahle Schangse gehabbd!

Abor wähn dun de Diogsien-Eior indressiern, die keem was zuleide dun, wenn off dor annorn Seide Schneevorwehung un Blidzeis offdrähnd dun?!

Mor had ja ooch schon gesähd, dass dor Diogsien-Schgandahl gewisse Broblehme gehabbd had, als wie wo ganz unvorhoffd de Schneeschmelze eingesedzd had. Isch gloobe fasd, da had das Deiming nisch ganz so rischdisch geschdimmd. De Schmelze is irschenwie e bißl zu frieh in das Diogsien neingebladzd! De Schmelze hädde guhd un gerne noch zwee drei Wochn wardn kenn - dann wärs mid geballdor Machd offgedroffn! Villeischd sogahr mid Dode!

Ährlisch - das bißl Hochwassor, was mir hier infolsche dor Schmelze gehabbd ham, konndesde eischendlich gladd vorgessn! Guhd, zum Ausgleich hads ja dann die driem an dor Mohsl un an dor Donau ordendlich erwischd. Bassau dad immorhin e baar Medor unnor Wassor lieschn! Da is das Diogsien doch schdellnweise erschdema e bißl nach hindn weggerudschd. Weils ehm ooch werglisch keene Dode gähm dud. Bis jedzde. Wenn sisch das nadiehrlich ändorn däde...

Da is ja sogahr de Schweinegribbe nochma hochgekomm... - hochgekomm, wie so e feddes Schdigg Eisbeen! - na, wos da kirzlich ma een Dodn gegähm had! Odor warns sogahr zwee?! Egahl - bei Dode had jede Gadaschdrofe, ooch wennse schon lange dod un begram is, nochma eene Schangse! Nee, isch bin sähr geschbandd, währ jedzde das Renn machn dud - Hochwassor odor Diogsien?

**Eduard Sachsenmeyer**